

15. august 2019

UKA2019/211

Inatsisartut suleriaasianni § 33 naapertorlugu Naalakkersuisut peqquneqarnissaannik Inatsisartut aalajangiiffigisassatut siunnersuut matumuuna imaattoq saqqummiuppara:

Kalaallit qimmiata aammalu qimussersuartoqartarneratalu qanoq ililluni kulturikkut piujuartinneqarsinnaaneri pillugit Naalakkersuisut misissueqqullugit peqquneqarnissaannik inatsisartut aalajangiiffigisassaatut siunnersuut. Susassaqtut peqatigalugit misissuineq ingerlanneqassaaq, misissuinerlu inatsisartunut agguanneqarumaarluni.

(Inatsisartunut ilaasortaq Doris J. Jensen, Siumut)

Tunngavilersuut:

Nunatsinni qimmeqarneq ukiuni kingullerni appariartupiloopoq ilaatigut silaannaap allanngoriartornera tunngavigalugu aammali qimuttunik qimmeqarnerup akisunera, pisariunera allanillu atortorissaarutinik unammillerneqarnera tunngaviulluni. Kalaallit qimmii nunarsuatsinni kisiartatuaalersimapput akuugaanngitsut, ukioq 1995 missaani 35.000-iusimagaluarput ukiunilu kingullerni taamaallaat 15.000-nnanngorsimallutik.

Misilitakkat takutippaat Avannaata Qimussersua ingerlanneqareeraangat sumiiffimmi sukkanniuffiusimsumi qimmeqarneq siuariartoqqilersartoq soqutiginninnerlu annertuseqqittarluni, ajoraluartumilli nunatsinni kalaallit qimmiinik qimmeqarfiusuni tamanit peqataaffigineqarneq ajorpoq aningaasat aporfiusarneri pissutaalluni tassani eqqugaasarput Avannersuarmiut, Upernavimmiut tunumiullu. Siunissami qimminik qimuttoqarfiusut tamarmik, meeqqanut inersimasunullu ukiut pingasukkaarlugit sukkanniunnersuarmi peqataasalernissaat kingullermik Avannaata Qimussersuaqartoqarnerani kattuffiup KNQK anguniarlugu oqariartutigaa. Tamanna piviusunngortinneqassappat aningaasat amerlanerusut kattuffimmiik pisariaqartinneqarput. Siunertaq tamanna naalakkersuinikkut tapersorsorneqassappat qularutissaanngilaq nunatsinni qimmit qimuttut amerliartoqqilernissaat aqqutissiuunneqassasoq.

Qimmit qimuttut nunatsinni amerliartoqqilernissaat aammalu inatsisitigut illersorneqarnerisa patajaatsumik inisisimanissaat qulakkiissagutsigu taava sukkanniuttarnerup saniatigut suliniutit Kommunini, Inatsisartuni Naalakkersuisunilu pimoorullugit ingerlanneqartariaqarput ass. KNQK, ilisimatusarneq tunngavigalugu misissuineq Qimmeq project, qimmit qimuttut pillugit ilisimatusarnermi PhD-mik suliaqartoq, qimmit qimuttut pillugit atuakkiorut, KNAPK susassaqtullu allat peqataatinnerisigut.

Takornariaqarneq annertusarniarlugu ukiuni tulliuttuni Ilulissani mittarfiup tallilerneqarnissaa anguniagaavoq qularnanngitsumillu kingunerissuaa qimussimik takornariartitsinerup ullumikkornit



**SIUMUT
INATSISARTUT**

annertunerusumik atugaalernissaa tamannali aatsaat pisinnaavoq qimmit qimuttut naammattut pigineqarpara.

Tamatta peqqinnarnerusumik inuuneqarnissaq anguniagaraarpput uninngaannnarani, spillerujuuinnarani qimusserneq timi tarnimullu peqqinnartuusoq soorluttaaq kattuffik malittarisassamini sukkanniunnerup nalaani pujortarneq inerteqqutaatikka qimmillu paarluarneqarnissaat anguniarlugu qimmerinnerpaamik toqqaasoqartarluni. Aammattaaq qimminik qimuttunik atuineq sukkanniunnerinnaanngilaq tassami inuussutissarsiornikkut imminut pilersorneq annertunerusumik ingerlanneqarsinnaasarloq.

Qularnanngitsumik tamatta aalassaatigisatsinnik Qeqertarsuarmi kalaallit qimmiata illersugaasup akuugaalersimasinnaaneranik kalerrinneqaratta uissummivugut tupinnanngitsumillu annertuumik aalassassimaartoqarpoq. Taamatut pisoqartillugu piaartumik iliuuseqarnissaq nakutiginninnerlu toqqisisimanerpaaq pisariaqarpoq. Uani pisup takutippaa aalisartoq piniartoq qimuttunik qimmilik illoqarfimmut nunaqarfimmulluunniit allamut nuussaguni qimmiisa nassarsinnaaneri killilersugaanngitsoq naak ernumagineqartuminngaanneeraluarpataluunniit.

Kalaallit qimmia ukiorpassuarni pigisarput ataavartumik piujaannarnissaa qulakiissagutsigu ikiliartuinnassanngippatalu immikkut iliuuseqartariaqarpugut taassaappummi qimmit qimuttut kalaallit ukiorpassuarni nungugatik inuuinnarsimanerannut tunngavileeqataalluinnartut. Taamaattumik qulaani tunngavilersutigisakka innersuussutigalugit matumuuna kaammattutigissavara qimmit qimuttut akuugaannginnissaat illersorniarlugu aammalu qimminik qimuttoqarfiusuni tamani sukkanniuttarnerup kulturitsinni tapersorsorneqarnerata annertunerulersinneratigut qimmeqarnerup siuariartoqqilersonnaanera anguniarlugu misissuisoqassasoq.

Neriuppunga siunnersuutinga Naalakkersuisut partiillu siunnersuut ilalerumaaraat nunatsinni kulturerput pingaaruteqarluinnartoq nukittorsaqqinniarlugu.

Pisortani allaffissornikkut aningaasaqarnikkut kingunissai:

Misissuinermk suliaqarneq naatsorsuutigineqarpoq AC-p ataatsip ukiup ataatsip iluani sulineratut naleqassangatinneqarpoq, tassa 500.000 kr. Uani suliaqarneq, nutserineq aammalu misissuinerup inernerinik agguaanerit.

Aningaasarsiornikkut allaffissornikkullu namminersorlutik inuussutissarsiortunut kingunissai:

Soqanngilaq

Aningaasatigut allaffissornikkullu innuttaasunut kingunissai:

Soqanngilaq